

## ALAHADY 2 - FIAVIAN'NY TOMPO - B



**« Dia niseho tany an'efitra i Joany Batista nitory batemim-pibebahana ho famelan-keloka » (Mk. 1, 4)**

Ry Kristianina havana, raha tadidintsika tsara tamin'ny Alahady lasa teo izay nanombohantsika ny Fiaviana dia nantintraterintsika fa mitaky toe-panahy ny fiainana ny Fiaviana izay manana fomba fisehoana telo. Ny voalohany dia izay niainana tamin'ny fiandrasana ny Mesia izay ankalazaintsika amin'ny Noely ny fahatongavany. Rehefa miresaka ny hoe fankalazana, noho ny asan'ny Fanahy Masina isika dia sady mahatsiaro no entanin'izany Fanahy izany ka mivelona ny fiomanana ny fahatongavana. Izany no antony anoloran'ny Eglizy izao vanim-potoanan'ny Avent na Fiaviana izao mba hamelombelona sy hivelomantsika ary hidirantsika amin'ny fahatongavan'i Mesia.

Vakiteny I : Iz. 40, 1-5. 9-11

Tononkira : Sal. 84,

Vakiteny II : 2 Pi. 3, 8-14

Evanjely : Mk. 1, 1-8

Misy akony manokana ho antsika ity Avent ity satria noho ny KORONTANAVIRUS dia maniry isika mba ho PANTEKOTY VAOVAO, HO DEPART VAOVAO, ho FIAINGANA VAOVAO aorian'izao. Miainga eo anivon'ny Fianakaviana Eglizy kely mifototra amin'ny vavaka sy fandalinam-pinoana izany DEPART VAOVAO IZANY HAHATONGA ANTSIKA HO EO MISIONERZA

ZARY TABERNAKLA VELONA MANORINA ETA.

Ny fiaviana faharoa dia amin'ny alalan'ny Sakramenta. Eo anivontsika tokoa ny Tompo ilay famonjena ka maninteraka ny fiainantsika fa indrindra amin'ny alalan'ny sakramentan'ny Eokaristia izay maniraka antsika ho misionera manambara an'izany famonjena izany tahaka an'i Kristy. Isika amin'izao androntsika izao no Kristy mpiara-belona amin'olona ka hitoetra ao amintsika anie I Kristy ka hamokatra bebe kokoa isika. Ho

EOV MISIONERA KA HO TABERNAKLA VELONA ISIKA, ho Kristy mpiara-belona amin'olona, ho génération Mpanorina fa tsy sanatria mpandrava.

Ny toetra fahatelo maneho ny fiaviana dia ny fiavian'ny Tompo amin'ny fomba manetriketrika, izany hoe ny fiverenan'ny Tompo ka hiseho sy hibaribary eo anivon'izao tontolo izao ny voninahitr'Andriamanitra. Izany koa no anisan'ny omanintsika.

Amin'izao Alahady faharoan'ny Fiaviana izao dia mampianatra antsika hiomana amin'izany tokoa ny vakiteny arosan'ny Eglizy : **“Amboary ny lalan'ny Tompo”**. Fiaviana tsy maintsy omanintsika tokoa izany. Rehefa manana vahiny manan-kaja ho avy isika dia samy miomana daholo handray izany vahiny izany. Ny vahiny manan-kaja andrasantsika dia ilay efa raisintsika amin'ny alalan'ny sakramenta ka izany no mahatonga izao vanim-potoana ny “Avent” izao hanamboarantsika ny lalan'ny Tompo.

Ny Vakiteny faharoa, taratasin'i Md Piera dia mampitodika antsika amin'ilay tena fanantenana izay andrasantsika ary efa manentana antsika dieny izao hanana fiainana kristianina. OLOM-PINOANA, OLOM-PANANTENANA, OLOM-PITIAVANA isika hoy ny hafatra pastoraly faha-8. Maro ny zavatra izay mahakivy antsika sy mahatonga antsika ho very fanahy mbola velona noho ny zava-misy iainantsika amin'izao ary mahatonga antsika miraviravy tanana fa indrindra vokatr'ity KORONTANAVIRUS ITY. Manentana antsika àry ny hafatr'i Md Piera mba hanana fanantenana. Tsy mamitaka na manodoka izany fanantenana izany fa ho avy tokoa ny lanitra vaovao sy tany vaovao. Tsy afaka hanao DEPART VAOVAO isika raha tsy OLOM-PANANTENANA. Raha miomana manamboatra ny lalan'ny Tompo tokoa isika dia tsy maintsy miova. Mila fiovam-penitra mahery vaika raha te hanavao ny fifandraisantsika amin'ny zava-boary, raha te hanavao ny fifandraisantsika eo anivon'ny fiara-monina misy antsika, raha te hanavao ny fifandraisantsika amin'Andriamanitra.

Isaorana Andriamanitra fa araky ny hafatr'i Md Piera dia mankahery, manamafy ny finoantsika izy fa tsy mandao antsika na oviana na oviana Izy Andriamanitra. Ny arivo taona dia toy ny andro iray ka tsy mba miova hevitra Andriamanitra fa matoky antsika Izy, manana fandefarana amintsika. Araka izany voalaza izany dia tsy maintsy ho tonga amin'izany lanitra vao sy tany vao izany isika fa ny tadiavin'Andriamanitra amintsika dia ny mba samy hanatona Azy sy hibebaka isika, ho vonona hanao ny fiaingana vaovao, “départ vaovao”. Na dia tampoka ny fiavian'ny Tompo, na mety hampangovitra araky ny voalazan'i Md Piera dia tsy ny handevona no tadiaviny fa ny hamelona. Hamonjy antsika Andriamanitra ka tiany halevintsika ny ratsy sy izay rehetra tsy mifanaraka amin'ny sitrak'Andriamanitra. Izany no tadiavin'Andriamanitra amintsika : hibebaka sy hanamboatra ny lalan'ny Tompo.

Ampianarin'izaia mpaminany ao amin'ny vakiteny voalohany fa ho avy ny Tompo hampiombona antsika ka ho zary tany sy lanitra vao mendrika ny maha-zanak'Andriamanitra antsika. Fankaherezana antsika ao anatin'izao KORONTANAVIRUS izao izany satria betsaka ny efa milaza fa ozon'Andriamanitra izao ka efa tonga ny farandro. Marina fa hisy tokoa ny farany satria voafetra isika. Loza izany ho an'izay tsy OLOM-PINOANA, ho an'izay tsy OLOM-PITIAVANA, ho an'izay tsy OLOM-PANANTENANA.

Aoka àry isika hanamboatra ny lalan'ny Tompo : Araky ny hafatr'i Joany Batista ao amin'ny Evanjely, izy izay mpialoha làlana, nanamboatra ny lalan'ny Tompo, dia tsy maintsy ho Joany Batista mpialoha làlana tahaka azy koa isika tsirairay avy. Mahatsiaro manokana antsika Katekista aho eto, isika tokoa no mpialoha làlana manampy ny olona hibebaka ka handray an'I Kristy amin'ny alalan'ny fandalinam-pinoana sy ny katesizy ataontsika. Iza tokoa ny vanim-potoana hiverenantsika sy handalinantsika ny finoantsika. Izany koa ny mahasarobidy ny Fianakaviana Eglizy kely mivavaka sy mandalim-pinoana satria manomana ny lalan'ny

Tompo. Mampirisika antsika hanohy sy hanampy izay hafatra any am-pelatantsika ary hamaly ireo fanontaniana napetraka amintsika ho fandalinam-pinoana.

Voalazan'izaia mpaminany ao amin'ny vakiteny voalohany sady averin'i Md Joany Batista ao amin'ny Evanjely ary tsy maintsy hiainantsika koa fa raha te handray an'I Jesoa isika dia tsy maintsy manamboatra ny làlan'ny Tompo any an'efitra. Misy lafiny roa izany : ny fontsika no tsy maintsy diovina, tsy maintsy mibebaka isika satria lasa vato noho ny fitiavan-tena ny fontsika hany ka tsy maheno ny kiakiakan'ireo manodidina antsika. Ohatry ny any an'efitra ny fiainantsika. Aoka hibebaka isika ka hiala amin'ny fitiavan-tena izay manapotika ny fiainantsika.

Ny lafiny faharoa, noho ny fanapotehantsika ny tontolo iainana dia rava ihany koa ity Tranobe iombonantsika ity ka zary efitra. Maina ny tontolo iainana ka aoka hanorina tany lava volo ho an'Andriamanintsika isika ka amin'izay ny tranobe iombonantsika mba ho mendrika honenantsika.

“Aoka ny lohasaha rehetra hasandratra”, izany hoe aoka isika hikatsaka an'Andriamanitra, hitodika amin'Andriamanitra, izay misy an'Andriamanitra no aoka ho fiainantsika ka aoka hivavaka isika, hibebaka, hanatona ny sakramentan'ny fampihavanana. Iza no andro tsara hiverenantsika amin'Andriamanitra.

“Ny tendrombohitra rehetra haetry”, izany hoe mila fanetren-tena izao androntsika izao fa tsy ny avonavona no hanenika ny fiainantsika izay mahatonga antsika tsy hiraharaha ny hafa. Matoa tsy afaka hitondra antsika amin'ny tena fihavanana ny ataontsika rehetra dia noho isika feno avonavona. Izay no lazain'izaia mpaminany.

“Ny avo hanjary tany lemaka”, izany hoe ho tany lonaka ity tanintsika ity, ny fiainantsika ho tany lonaka hamokatra ka hamokatra ho an'ny besinimaro satria izany no harena. Manan-karena isika raha samy mamokatra ka mamokatra ho an'ny besinimaro mikatsaka ny soa iombonana.

Matoa mikoroso fahana ny fiainam-pianakaviana, ny fiaraha-monina, ny firenena dia satria eo ny fialonana, ny avonavona, ny tsy fahaizantsika mijoro amin'ny fahamarinana, ny fanilikilihantsika ny hafa. Raha tiantsika hamokatra tokoa ny fiainantsika dia aoka hibebaka isika handray an'i Jesoa. Izany rahateo ny hafatra fototra entin'ny hafatra pastôraly : OLOM-PINOANA, OLOM-PITIAVANA, OLOM-PANANTENANA KA MIARAKA MANAO DEPART VAOVAO. Izany ny fankalazana ny noely sy ny anton'izao fiomanantsika izao ka hanamboarantsika ny làlan'ny Tompo mba ho “départ vaovao”. Matoa tonga Olombelona tokoa I Kristy dia hanavao ny zava-drehetra. Hanavao ny fifandraisana amin'Andriamanitra, fifandraisana amin'ny samy olombelona, fifandraisana amin'ny zava-boary. Izany no atao FAHARIANA VAOVAO..

Ry Jesoa Tompo ô, lanao no tonga eto anivonay. Ampio izahay hiverina Aminao ka hibebaka marina araky ny hafatr'izaia mpaminany sy i Joany Batista. Enga anie ny fankalazana ny fiaviana izao hanampy anay hiomana bebe kokoa hihavao tokoa ka vonona hanao “départ vaovao”. Hibebaka izahay ka hanatona ny sakramentan'ny fampihavanana. Aniraho Joany Batista maro izahay, aniraho mpialoha làlana izahay hanomana ny fahatongavanao. Ary eng a nie izahay koa ho zary Joany Batista mpialoha làlana amin'ireo manodidina anay. Ry Jesoa Tompo ô, tongava ary aza ela intsony. Masina Maria Reny ô, omano ny fonay handray an'I Jesoa, omano ny fianakaviana Eglizy kely hahay handray an'i Jesoa. Amen

Mompera Arseveka Mgr Benjamin Ramaroson